



ALTI HAIMELIGI
VERSCHNUUFFER Fasnacht 2017

Wo isch dr Strich?

Wo isch dr Strich? Jä, weele Strich?
Dä Strich, wo die, wo uff e Strich
geen, yygränzt, ass die, wo dr Strich nit lyyde kenne
sich von däm pār grienem Strich so kenne drenne.
Dä giftiggrien uffgspritzti Drenningsstrich
verhilft däne drhinder zem Binde-Strich.
Fir die, wo dert woone, isch das aber gar kai Stich,
doch das zellt nit – s wär nur e Gedanggestrich.
De griene Schaabe, wo ussedra uff Kundschaft warte,
zaigt d Schuggerei denn hi und do die roti Karte.



Aber uns goot anders gegen e Strich:
So wenn vor der Waale – jä, dasch under em Strich –
die ainte mit Selfies, die andere pār Schwumm
uff sich uffmerggsam mache, dasch numme no dumm.
Vellicht isch dr Schwumm aber e bitz e Brognose:
Au im Amt dien sy schwimme, das goot denn in d Hose.
Dr Dürr het scho grad dr Biwyys aadrätte
mit Ungheerigkaite, isserscht unnätte.
Me syg am Korrigiere – sit ebbe drei Joor!
Das goot ys gegen e Strich, denn s isch aifach nit woor.
Näbeby: werum haisst die grieni, das giengti doch au,
Regierigsbresidäntin nit Ackerfrau?
So feminischtisch und grien, das wär denn e Stich –
und Ackermää goot ere bschtimmt gegen e Strich.

Au z Bärn birschte verschiideni gegen e Strich.
Das git ys denn jedes Mool e Stich.
Si hän und wärde gschmiirt und sy schmiire sich
grad sälber. Wo isch denn bi dääne dr Strich?
Bivoor die Verwaltig no ganz duet uusarte,
gheert däne scho s erscht Mool aini an d Schwarte.

D Laitig vo dr Armee isch gaischtig uff der Schnuure,
die diggen au anderscht naimeduure;
sy lyyde am e kollektive Stich
und wissen au nimm, won er isch, dr Strich.
Sy verwäggsle *Star Wars* mit däm, wo sy dryybe,

dien Strofaazeaige gegeneinander schryybe.
Sy maine, die Stärn uff dr Aggsle syge si sälber,
drby sin die maischte doch aifach Kälber.
Nit häll sin die Stärnli, sy glyyche eenter doch
em e Magnetfäld im ene schwarze Loch.
Die ytle Haanekämpf sin under em Strich
und geen ys, widerlig, ganz gegen e Strich.
Es fäält enen au – und dasch allerhand –
ganz aifach am neetigen Aastand.

Dä fäält, en Abstrich an dr Kultur,
au Hinz und Kunz, e Grund zer Druur.
D Auge am Smartphoon und Stepsel in den Oore
bisch gard fir e Zämmebutsch uuserkoore.
Denn flueche sy no, mit Uusdrigg underem Strich –
Au das, De verrootsch s, goot ys gegen e Strich.
S glyych gilt gnau, wenn d FCB Fän
die andere mit Pyro erstarre leen.
Die Rippelhaftigkait und Gwalt samt Stich,
die goot ys saumässig gegen e Strich.

Hesch ebbe Dooping gsait? He aber au.
Das macht dr Spitzesport diräggt zer Sau.
Me froggd sich, ob die, wo nit doope diege,
nur schwindle dien, ass sich d Bälgge biege.
Doch doope ka men au mit Gäld
in däre vo Gier verdorbene Wält.
So dryybe Parlamentarier vom Europarot
bestoche an de Menscherächt Verrot.
No China verkauft me Wirtschafts-Drimpf samt Stich,
das alles goot ys, nai s isch zem..., jä, y brich.
Em Trump sy Kabinett-Uuswaal
bestoot us Gaischterbaanpersonal,
dä Club vom Twitter-Wieterich
isch dief, dief under jedem Strich.

Do sin doch d Drottwaaramlse haimelig, persee,
sy richte jo kai Schaden aa, herjeminee.
Doch d Bolitik will die wirgglige Brobleem nit gsee,
das wär jo no, das miechti jo no wee.
Sy luegt mit em Balgge im Aug an dääne vrbyy,
sunscht miesst sy mit sich sälber stränger sy.
Sy seet au nimm, was sich nit gheert, dä wichtig Strich –
und das goot ys grad am maischten gege dr Strich.

D Ladäärne-Uusstellig uff em Minschterplatz und d Waage- und Reggwisyte-
Uusstellig bi dr Kasäärne sin vom Määntig znacht bis am Mittwoch demoorge!
Deert und an de 3 Verkaufsständ (CINS) in dr Stadt ka men au alli Zeedel
und Schnitzelbängg, d Blaggedde und dr Rädabäng kaufe.
Am Fritig und Samschtig, 10. und 11. März 2017 isch Noochwuggswärbig

vo dr 1. Lektion im Zält uff em Barfi.

D'Zeedelläsete isch am Sunntig noo dr Fasnacht 2017 am 12. Meerz
vom Fimfi bis am Siibeni zoobe, in dr Baseldytschi Bihni (im Lohnhof).
Dr Ytritt isch vergäabe. D Foyer-Bar isch vom Vieri ewägg offe.

As Gnopf ab 7 bisch bi de Verschnuuffer willkomme! <http://www.verschnuuffer.ch>